



mjesečni Bilten

omladinska mreža bosne i hercegovine

april
travanj
2017.

215

Dragi prijatelji/ce,

Predstavljamo vam aprilsko izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **182** organizacije i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

| | |
|---|----|
| Aktivnosti u aprilu 2017. | 2 |
| Planovi za maj 2017. | 6 |
| Aktivnosti članova mreže | 7 |
| Saopštenja/informacije/donatori/pozivi..... | 22 |

Uživajte u čitanju!

AKTIVNOSTI ORC/HCA U APRILU 2017.

KUVI (Korisna upotreba veteranskog iskustva) dijalog

Regionalna mirovna inicijativa u BiH - ReMI mreža, u saradnji sa Omladinskim resursnim centrom Tuzla, realizovala je 4.4.2017 godine u Tuzli „Kuvi dijalog“. Ovaj dijalog je okupio 20 mladih sa područja Tuzlanskog kantona u dobi od 17 do 25 godina. Tokom dijaloga učesnici su imali priliku da razgovaraju sa tri ratna veterana o njihovim iskustvima tokom rata, o tome kakve je posljedice rat ostavio na njih i njihove porodice, o predrasudama i informacijama koje mediji danas plasiraju o ratu u BiH, o tome kakav je odnos države prema veteranima i kako mladi danas gledaju na rat koji se desio u Bosni i Hercegovini.



Po završetku dijaloga, učesnici su predložili da se ova ideja treba nastaviti širiti, jer svako ko ne poznaje historiju osuđen je da je ponavlja. Omladinci Adi Selman, Merita Sokoli, Husein Šljivić, Ivana Jokić, Adnan Čirak, Eldin Mujkanović i Amina Džafić su bili učesnici dijaloga ispred Omladinske grupe ORC.

Međunarodni dan djece ulice

Poruku "Danas je došlo naše vrijeme. Hoćeš li stati uz mene?", 12. aprila poslala su sva djeca ulice u svijetu, pa i u Tuzli.

Međunarodni dan djece ulice, 12. april, obilježava se s ciljem podizanja svijesti i skretanja pažnje nadležnih institucija na problem djece uključene u život i rad na ulici, koja odrastaju bez odgovarajuće skrbi, uskraćena za osnovna ljudska prava i koja su često žrtve različitih oblika eksploatacije i nasilja. Ustanovljen je 2011. godine od strane Konzorcijuma za djecu, globalne međunarodne mreže posvećene ostvarivanju prava djece uključene u život i rad na ulici. Ne postoje podaci koliko tačno je djece na ulici, na koju ih uglavnom tjeraju ekonomski razlozi.



U okviru obilježavanja Međunarodnog dana djece ulice, novoosnovana Koalicija za borbu protiv mržnje iz Tuzle, čiji je član i Omladinski resursni centar Tuzla, uz podršku Misije OSCE-a u BiH, organizovala je i turnir u košarci za mlade. Ovim turnirom je ozvaničen početak djelovanja novoosnovane Koalicije za borbu protiv mržnje iz Tuzle, koja okuplja oko 20 nevladinih organizacija i koja će se pridružiti mreži koalicija za borbu protiv mržnje koje djeluju širom Bosne i Hercegovine. Omladinska grupa ORC-a je aktivna članica i jedan od osnivača Koalicije.

Svoj doprinos obilježavanju Međunarodnog dana djece ulice dali su Adi Selman, Ivana Jokić i Nedim Musić.

Omladinska grupa ORC Tuzla

Vizije mreže mladih



Od 2. do 8. aprila u glavnom gradu Slovenije održan je trening „Visions of youth work“, koji je okupio omladinske radnike iz 5 država. Treningu su prisustvovali radnici iz Turske, Grčke, Srbije, Slovenije i Bosne i Hercegovine. Tema treninga su bile strategije upravljanja društvenim mrežama u cilju animiranja što većeg broja mladih i bolje vidljivosti na ovim mrežama koje preplavljaju mlade.

Partner iz Bosne i Hercegovine je bila organizacija PRONI centar za omladinski razvoj Brčko, a predstavnik Omladinske grupe ORC-a Slobodan Blagovčanin.

Okrugli sto „Transparentnost i odgovornost kao mehanizmi antikorupcijskog djelovanja“

U Sarajevu je 26. aprila organizovan Okrugli sto na temu „Transparentnost i odgovornost kao mehanizmi antikorupcijskog djelovanja“, pod okriljem Transparency Internationala Bosne i Hercegovine. Okruglom stolu su prisustvovali predstavnici organa Javne uprave i nevladinih organizacija, a diskutovano se o principima transparentnosti i odgovornosti u radu javne uprave, te značaja ovih principa u kontekstu antikorupcijskog djelovanja. Predstavnik Omladinskog resursnog centra bio je Slobodan Blagovčanin.



SNAP ACTIVISM



U periodu od 23. do 28.4.2017. održan je seminar „SNAP ACIVISM“, na kojem su se učesnici pozabavili pitanjima srednjoškolaca. Seminar je održan u Kragujevcu (Srbija), a na njemu su učestvovali mladi iz Srbije, Bosne i Hercegovine, Makedonije, Ukrajine, Albanije, Kosova, Bugarske i Crne Gore. Učesnici su kroz radionice pokušali pronaći odgovore na pitanja srednjoškolaca, te način na koji se može povećati i poboljšati aktivizam srednjoškolaca.

26.4.2017. učesnici su posjetili Prvu kragujevačku gimnaziju, gdje su imali priliku razgovarati sa srednjoškolcima i saznati na koji način vijeće učenika rješava pitanja srednjoškolaca u svojoj školi, te koje su njihove aktivnosti. U ovim aktivnostima su učestvovali Amila Selimbašić i Emir Mujakić.

Youth Earth Day



U sedmici posvećenoj planeti Zemlji, u više od 150 zemalja diljem svijeta, 22. aprila se obilježava Dan planete Zemlje (eng. Earth Day). Omladinska grupa Omladinskog resursnog centra, u saradnji sa Youth Build International i PRONI Centrom za omladinski razvoj Brčko je za tu priliku organizirala ekološku akciju „Youth Earth day“. Akcija je održana 28.4. na lokaciji područne Osnovne škole „Požarnica“. Volonteri Omladinske grupe su, zajedno sa marljivim osnovnoškolcima i susretljivim nastavnim osobljem, održali čas u prirodi i zasadili dvorište škole raznim vrstama cvijeća i zimzelenog drveća.

Učenci su imali priliku osvojiti majice odgovarajući na pitanja vezana za ekologiju. Omladinci i osnovnoškolci su uz druženje i učenje na svježem zraku, sa podrškom nastavnog i drugog osoblja škole, posadili 45 cvijetnih sadnica i 40 čempresa.

Osmijesi na licima učenika i njihova volja za radom su jasan pokazatelj uspješnosti akcije. Vršnjaci koji su promatrali akciju kroz prozor nisu mogli izdržati da ne izađu i pridruže se uljepšavanju školskog dvorišta. Pedagogica škole je posebno pohvalila ovu akciju ističući njen pedagoški aspekt, jer je sve bilo organizirano na način da su učenici bili u centru pažnje.

Područnu Osnovnu školu u Požarnici većinski pohađaju djeca povratničkog stanovništva, pa je njihovo učešće u ovoj akciji od velikog značaja. Akcija je protekla u pozitivnoj atmosferi, te bi svakako trebalo biti više ovakvih aktivnosti saradnje neformalnih i formalnih struktura obrazovanja.



Primamo nove članove

Od 2012. godine u sastavu ORC Tuzla djeluje i Omladinska grupa koja broji preko 20 aktivnih članova. Članovi grupe svake godine realizuju projekte za mlade u Gradu Tuzla. Projekti su različitih sadržaja, pa se tako realizuju sportski projekti, edukativni projekti, projekti za političku participaciju mladih i slično. Pohvalna stvar u grupi je da brinemo o podjednakoj zastupljenosti oba spola, tako da je u svakom trenutku u grupi podjednak broj muških članova i ženskih članica.



Šta vam nudimo:

- Edukacije o omladinskom aktivizmu
- Odlaske na seminare, treninge i radionice u BiH i inostranstvu
- Super zabavno druženje
- Nova poznanstva
- Priliku da putujete i usavršavate sebe

Šta od vas tražimo:

- Želju za učenjem
- Aktivnost i inovativnost
- Prisustvo na našim sastancima minimalno 2 puta mjesečno
- Učešće na projektima i aktivnostima koje zajedno realizujemo

Ukoliko želite biti dio jedne od najaktivnijih omladinskih grupa u Tuzli molimo vas da popunite sljedeći upitnik.

https://docs.google.com/forms/d/1f0Z54ru6mEj8Sx8n8t2v3kneOMTc1TgLWQWmnMEQs0Q/viewform?edit_requested=true

Redovne aktivnosti ORC i hCa Tuzla:

Tokom aprila radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.

Online kampanja za borbu protiv govora mržnje

Grupa studenata iz Bijeljine, Brčkog i Tuzle zajednički okupljena oko PRONI i ORC Tuzla provodi kampanju "Građani protiv terorizma" ili u daljem tekstu CAT (Citizens against terrorism).

Kampanja je namijenjena svim građanima Bosne i Hercegovine, a za cilj ima pozvati građane da se zajednički uključe u borbu protiv terorizma i radikalizma u našoj državi. Kampanja je započela prije nekoliko dana, a sve zainteresovane korisnike najpopularnije društvene mreže "fejsbuk" pozivamo da prate i podrže rad naših studenata: www.facebook.com/CATBIH

Također, svi građani koji žele da se aktivno uključe u naše aktivnosti, te budu učesnici na nekoj od uličnih akcija ili okruglih stolova koje studenti samoinicijativno organizuju na ovu temu, mogu da popune sljedeći upitnik: <https://goo.gl/cPTTmD>

Podržimo mlade!

<https://www.facebook.com/CATBIH/>



PLANOVI HCA/ORC-A ZA MAJ 2017.

- Sprovođenje redovnih aktivnosti kroz Omladinsku mrežu BiH;
- Aktivno učešće u međunarodnoj ALF mreži, održavanje i logistička podrška ALF Mreži Bosne i Hercegovine;
- Pripreme za organizovanje i organizovanje godišnjeg sastanka ALF mreže BiH;
- Nastavak aktivnosti na partnerskom projektu „Crew from the hood – Messages from province“, sa partnerima iz Srbije (Forum građanske akcije – FORCA Požega) i Crne Gore (NGO Fenomeni Kolašin). Izrada uličnog panoa u Tuzli.

AKTIVNOSTI ČLANICA OMLADINSKE MREŽE BiH



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice



Omladinska organizacija Svitač je u aprilu nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Koordinatorica jutarnjih radionica je pripremila plan aktivnosti na temu prava životinja, zdravlje, vrijeme u raznim godišnjim dobima, životinje, cvijeće i maske. Kao i do sada, svake su srijede slušali i vježbali razne dječije pjesmice namijenjene njihovom uzrastu, kako bi na taj način vježbali ritmiku i polako usvajali tekst. Muzički dio radionica je takođe bio priprema za nastup na "Proljetnom festivalu" koji je održan krajem aprila. Četvrtkom su radionice bojenja i pisanja brojeva uz pomoć radnih listova za bojenje, takođe ponavljanje oblika i boja na engleskom i njemačkom jeziku. Materijali koji su se koristili za realizaciju ovih radionica su ljepilo, žica, kolaž papir, blokovi za crtanje, voštane boje, flomasteri, drvene i vodene bojice, kamenje, listovi, grane. Cilj ovih aktivnosti kao i do sada je da djeca razviju

maštu i da koristeći razne materijale izraze svoju kreativnost, takođe da razviju motoriku i poštovanje prema drugom i usvoje lijepo ponašanje. U aprilu je do 20 učesnika pohađalo jutarnje dnevne radionice.

Poslepodnevna grupa prati raspored koji je svaki dan drugačiji, pokušavajući obuhvatiti što više različitih tema i aktivnosti. (uzrast 8+).

Ponedjeljkom su radionice kreativnog izražavanja, utorkom engleski jezik, komunikacija, izgovor, te razne igre koje pospješuju učenje stranog jezika u grupi. Grupa je takođe i ovaj mjesec pored gramatičkih zadataka vježbala komunikaciju na engleskom jeziku na temu opisne riječi (izgled, karakteristike osoba, hobi, članovi porodice, pisanje priče). Srijeda je dan za muziku i pjevanje, učenje osnova na muzičkim instrumentima gitari i klaviru, uključujući teoriju muzike za početnike i čitanje nota. I ovaj mjesec je tema bila identifikacija muzičkih instrumenata u pjesmama. Svakog četvrtka starija grupa je podijeljena u dvije manje, i učesnici imaju mogućnost da se okušaju u društvenim igrama i timskom radu, razvijajući osjećaj za poštovanje drugog, socijalizaciju i fer igru. Petkom su radionice njemačkog jezika kao i dan za pomaganje u izradi domaće zadaće.



Radionice se održavaju u Omladinskom centru Brčko distrikta. Koordinator radionica u aprilu je bila Milica Baćanov, uz asistenciju lokalnih i Weltwaerts i EVS međunarodnih volontera Alexandera Likica iz Njemačke,

Mahmuta Taha Bicera i Yunusa Seckina iz Turske te Eleonore Pearson i Bena Owensa iz Velike Britanije. Broj učesnika starije grupe je trenutno između 15 i 20 učesnika.

„Pričajmo njemački“ – radionice komunikacije na njemačkom jeziku sa izvornim govornicima

Radionice njemačkog jezika se održavaju svakog četvrtka u prostorijama Omladinskog centra Brčko distrikt od 17:30-19:30 časova. I ovaj mjesec je grupa radila na komunikaciji i temama iz svakodnevnice, kako se predstaviti i ispričati zanimljive stvari o sebi, te ostalim zanimljivim temama koje su prilagođene uzrastu učesnika. Grupa je takođe radila vježbanje slušanja, te pisanje i čitanje. Radionice komunikacije na njemačkom jeziku su namijenjene za sve koji žele naučiti osnove gramatike, ali i usavršiti već postojeće znanje i steći nova iskustva i poznanstva. U aprilu je grupa radila na temu hrana u restoranu i obradi određenih tema koje su prilagođene uzrastu učesnika. Koordinator projekta je međunarodni volonter iz Njemačke Alexander Likic. Radionice pohađa 10 učesnika (dvije grupe).

„I love English“ – radionice komunikacije na engleskom jeziku sa izvornim govornicima

Radionice engleskog jezika se održavaju svake srijede u prostorijama Omladinskog centra Brčko distrikt od 19:00-20:00 časova. Radionice komunikacije na engleskom jeziku su namijenjene svima koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. Ovaj mjesec je koordinator radionica više pažnje posvetio gramatici i temama studiranja i buduće zanimanje. Koordinator projekta je međunarodni volonter iz Velike Britanije Ben Owens. Radionice pohađa 10 učesnika.

„Učimo Turski“ – radionice komunikacije na turskom jeziku sa izvornim govornicima

Radionice turskog jezika se održavaju utorkom u prostorijama Omladinskog centra Brčko distrikt od 18:00-19:00 časova. Radionice komunikacije na turskom jeziku su namijenjene za sve koji žele naučiti osnove gramatike, upotrebu svakodnevnih fraza i drugih elemenata, ali i usavršiti već postojeće znanje i steći nova iskustva i poznanstva. Učesnici su do sada imali priliku da usvoje alfabet turskog jezika, lične zamjenice, fraze predstavljanja, te da započnu jednostavne dijaloge. Koordinator projekta su međunarodni volonteri iz Turske Yunus Seckin i Mahmut Taha Bicer. U aprilu je bilo prisutno do 10 učesnika.

„Love Art?“ – radionice kreativnog izražavanja za uzrast 16+

Radionice kreativnog izražavanja se održavaju svakog utorka u prostorijama Omladinskog centra Brčko distrikt od 19:00-20:30 časova. Ove radionice su namijenjene za sve koji vole umjetnost i istoriju umjetnosti, te crtanje, slikanje i druženje uz diskusiju. Učesnici su ovaj mjesec završavali tehničko crtanje (proporcije, sjenčenje, crtanje crno-bijelom tehnikom). Otvorena je i nova tema „Renesansa – teorija i osnove slikanja u renesansnom periodu. Koordinator projekta je međunarodna volonterka iz Velike Britanije, Eleonore Pearson. Radionice je u aprilu pohađalo 5 učesnika.

„Freeletics“ – sportske radionice

Sportske radionice se održavaju utorkom i četvrtkom od 21:00-22:00 časova u prostorijama Omladinskog centra Brčko distrikt i namijenjene su mladim ljudima koji žele da poboljšaju motoriku, kondiciju i tjelesnu snagu, te da steknu nove vještine i poznanstva. Koordinator vježbi za kondiciju i motoriku je međunarodni volonter iz Njemačke Alexander Likic.

Radionice gitare

Učesnici radionice gitare su nastavili uvježbavati etide i kompozicije Rolanda Dyensa, Carla Domeniconija, Franciska Tarrrege, Fernanda Sora, kao i duete Francisa Kleynjansa i Johna Dowlanda. Novi polaznici su se nastavili upoznavati sa osnovama instrumenta.

Radionice sambe

Učesnici ove radionice nastavili su rad na lakšim kompozicijama (Samba Reggae, Batucada i Funk) uvježbavajući kontinuirano sviranje istih bez pauze između, uključujući improvizaciju i varijacije u sklopu navedenih kompozicija.

Mamuts World Tour



U četvrtak, 13. aprila, Omladinsku organizaciju Svitac su posjetili Isaac (31 godina) i Nikos (26 godina), koji su krenuli na put oko svijeta na motorima. Održali su dvije radionice, od 14:00 do 15:30 časova za uzrast 8-14 godina, i jednu u večernjem terminu za uzrast 16+, na kojima su učesnici mogli više saznati o njihovoj avanturi i razlozima za takav način putovanja, te pogledati par video klipova i njihovu motorističku opremu, koja je bila posebno zanimljiva za mlađi uzrast. Nikos i Isaac su svoju motorističku turneju nazvali „Mamuts World Tour“, a za više informacija možete pratiti njihove putešestvije na Facebook-u i Instagram-u.

Proljetni festival 2017.

Omladinska organizacija Svitac je 21. aprila u 18:00 časova, u prostorijama Omladinskog centra Brčko distrikta, organizovala „Proljetni festival“- večer druženja, igre i zabave. Interesantan program, koji su pripremili internacionalni i lokalni volonteri Omladinske organizacije Svitac, bio je namijenjen porodicama i prijateljima učesnika, ali takođe i djeci i mladima iz Brčkog koji nisu članovi organizacije. Učesnici dnevnih aktivnosti Omladinske organizacije Svitac uzrasta 4-7 godina su izveli dvije pjesme: „Leptiriću šareniću“, i „Music man“ (na engleskom jeziku), a koje je sa njima pripremio međunarodni volonter Ben Owens zajedno sa koordinatorom projekta Milicom Baćanov i ostalim lokalnim i međunarodnim volonterima. Članice dnevnih aktivnosti uzrasta 9-13 godina su otpjevale 2 pjesme, a publika je imala priliku da čuje i klasični komad „Paunov ples“ na flauti, te da pogleda izvedbu plesne grupe organizacije Svitac.



Lokalni volonteri Omladinske organizacije Svitac, koji su prije par mjeseci osnovali grupu „Pshionauti“, su izveli dvije akustične pjesme, što je veoma pozitivno iznenadilo sve goste.

Ove godine su naš program upotpunili i naši prijatelji iz „Amika Kuća Prijateljstva“, čije je učešće bilo u znaku Dana planete zemlje, koji se inače obilježava 22. aprila. Najmlađi članovi Amike su izveli pjesmu „Pingvini“ i time nas podsjetili koliko je važno da se na vrijeme pobrinemo za našu planetu. Gosti su takođe imali priliku pogledati kratki film „Obična poruka“, i spot „Dan planete zemlje“, koje su snimili članovi filmske sekcije Amika. Publika je imala priliku da čuje izvedbe pjesama grupe EKV -Zemlja za nas - i pjesmu –Radioactive- grupe Imagine Dragons koje su izveli članovi muzičke vokalne sekcije Amika.



Nakon programa mlađi učesnici su imali priliku da u velikom holu Omladinskog centra Brčko posjete tri kreativne stanice – ukrašavanje planete zemlje, drvo želja i face painting i da se osvježe uz sok i grickalice koje je pripremio tim Svitac. Proljetni festival je posjetilo oko 100 gostiju.

Za maj se planira nastavak svih redovnih radionica Omladinske organizacije Svitac.



Međunarodni volonteri u OO Svitac

**Institut za razvoj mladih KULT**

Ul. 4. viteške brigade 34-36 BA, 71210 Ilidža, Sarajevo

E-mail: kult@mladi.org

Tel.: +387 33 778 778; Fax: +387 33 778 779

Web: www.mladi.org

Izradom strategije prema mladima do boljeg života u KS

Počela je izrada prve Strategije prema mladima Kantona Sarajevo. Komisija za izradu Strategije koju je imenovala Vlada KS, a koju čine predstavnici kantonalnih ministarstava i nadležnih skupštinskih komisija, Gradske uprave Grada Sarajevo, Vijeća mladih KS, Studentskog parlamenta UNSA i Asocijacije srednjoškolaca u BiH, prošla je obuku procesa izrade ovog strateškog dokumenta.

Dokument će ponuditi rješenja za ključne probleme ove populacije u oblastima obrazovanja, zapošljavanja, zdravlja, kulture i sporta, mobilnosti, slobodnog vremena.



Strategija će definisati aktivnosti i mjere za poboljšanje statusa mladih u ovom kantonu, a biće sačinjena na osnovu podataka Analize o potrebama i problemima mladih Kantona Sarajevo koju je izradilo Ministarstvo za obrazovanje, nauku i mlade KS, uz podršku Instituta za razvoj mladih KULT.

„Mladi nemaju samo probleme već i potrebe. Moramo voditi računa o tim potrebama ukoliko ne želimo poslije tražiti rješenja za probleme.“ – poručio je Jasmin Bešić, izvršni direktor Instituta za razvoj mladih KULT.

Institut za razvoj mladih KULT pružat će savjetodavnu podršku tokom izrade prve Strategije prema mladima u Kantonu Sarajevo.

Donošenjem Zakona o mladima Federacije Bosne i Hercegovine, svi nivoi vlasti obavezali su se kreirati i usvojiti Strategiju prema mladima. Ona predstavlja dokument institucija vlasti s programskim pristupom djelovanja prema mladima, a uključuje definisane probleme i potrebe mladih, strateške pravce djelovanja, ciljeve i mjere za njihovu realizaciju.

Kako poticajima bolje pomoći bh. Privredi?

Institut za razvoj mladih KULT, 17. maja 2017. godine, u hotelu Holiday u Sarajevu organizovat će konferenciju "Kako poticajima bolje pomoći bh. privredi?"

Na konferenciji će biti predstavljena Analiza budžetskih poticaja privredi u BiH u 2015. godini, te će se razgovarati o procesu dodjele sredstava i mogućim unapređenjima ovog procesa, perspektivnim granama privrede i preporukama za naredne cikluse dodjele poticaja privredi koje su nastale kroz trogodišnje istraživanje Instituta o dodjeli poticaja privredi.

Konferencija će okupiti predstavnike privrede, akademskog sektora, te vladinog i nevladinog sektora, koji će imati priliku iznijeti sugestije za poboljšanje procesa dodjele budžetskih poticaja kako bi oni zaista olakšali poslovanje bh. privrednicima.

Podrška za aktivne mlade

Institut za razvoj mladih KULT podržao je inicijative polaznika obuke „Uči, misli i djeluj!“ – Generacija 10, a koje su za cilj imale razvoj lokalne zajednice i motiviranje mladih da budu aktivni članovi/ce društva.

Tako su mladi iz Bužima svojim sugrađanima poklonili park, dok su njihovi vršnjaci iz Berkovića intenzivno radili na razvoju vještina mladih iz ove lokalne zajednice.

Volonteri Udruženja mladih Bužim obnovili su ekološki park. „Borik“. U okviru inicijative „Proljetni muštuluk“ uređene su staze za šetanje, postavljene klupe i stolovi, te klackalice i ljuljačke za djecu.



Mladi iz Berkovića iskoristili su vještine stečene tokom obuke „Uči, misli, djeluj!“ i kroz inicijativu „Aktiviraj se, budi društveno koristan“ organizovali obuke za šesnaestero mladih iz Berkovića i Ljubinja. Mladi su učili o omladinskom aktivizmu, volontiranju, mirnom načinu rješavanja konflikta, te vještinama komuniciranja i javnog nastupa. Cilj je bio edukovati buduće društveno korisne aktiviste koji će znanja prenositi na druge mlade ljude u ovim općinama.

Institut za razvoj mladih KULT već narednog mjeseca počinje jednogodišnji program obuke omladinskih lidera/ki **UMiD** (Uči, misli i djeluj!) za jedanaestu generaciju. Obuka UMiD omogućava mladima da postanu aktivni lideri/ice u svojoj lokalnoj zajednici, pomognu u rješavanju problema mladih, steknu nove vještine i usavršavaju sebe.





Udruženje studenata medicine u Bosni i Hercegovini
Bosnian and Herzegovinian Medical Students' Association

Nacionalni član Međunarodne federacije udruženja studenata medicine (IFMSA)
National member organization of IFMSA



Prijateljsko takmičenje Specijalne olimpijade „BoHeMSA“ – 4.-7. April 2017.

Početkom aprila u Tuzli se po prvi put održalo Prijateljsko takmičenje Specijalne olimpijade BoHeMSA. Projekat Specijalne olimpijade BoHeMSA je implementiralo Udruženje studenata medicine u Bosni i Hercegovini „BoHeMSA“ lokalni komitet Tuzla, zajedno u saradnji sa Medicinskim fakultetom Tuzla i Univerzitetom u Tuzli.



Prvi segment projekta koji je krenuo sa implementacijom su bila istraživanja i edukacije sa srednjoškolcima, kada je u pitanju njihov stav ka osobama sa poteškoćama u mentalnom razvoju. Nakon rezultata ankete, odrađene su edukacije od strane članova našeg tima i vanjskih saradnika, te i ponovno reanketiranje sa sada vidljivo boljim rezultatima u odnosu na prvobitnu analizu.

Sam projekat je obuhvatio takmičenja iz četiri oblasti: fudbal, košarka, atletika i plivanje. Na projektu je učestvovalo preko 300 takmičara i 20 timova koji su bili raspoređeni u svojim odgovarajućim disciplinama. Bitno je navesti da su takmičari i ekipe bili iz cijele BiH ali i okolnih zemalja. U srijedu se odgiravalo takmičenje iz košarke, u četvrtak je uslijedila promocija „Healthy“ programa u Univerzitetskoj dvorani, plivanje u prostorijama Hotela Tuzla, te atletika na Gradskom stadionu Tušanj.



U petak, na Svjetski dan zdravlja, prolaznici na Trgu Slobode su imali priliku kupiti materijal koji je nastao prethodnih dana na radionicama u kojima su učestvovali korisnici Udruženja „Malo Srce“ kao i srednjoškolci iz Tuzle. Radionice su vodili članovi BoHeMSAe, te studenti sa Edukacijsko-rehabilitacijskog fakulteta Tuzla sa ciljem podsticanja kreativnog izražaja, ali isto tako i sa ciljem destigmatizacije i inkluzije osoba sa poteškoćama u mentalnom razvoju kroz zajednički rad sa srednjoškolcima. Sav skupljeni novac će biti usmjeren na izgradnju pristupne rampe za osobe sa invaliditetom u JU Dom zdravlja Tuzla.

Centralna manifestacija koja je uzela svoje mjesto u petak je javna tribina „U zdravom tijelu zdrav duh – kretanjem do zdravlja“ koja je počela u 15h u punom amfiteatru Medicinskog fakulteta Tuzla. Učešće na javnoj tribini su uzeli ljekari, profesori, sportisti, kao i naravno predstavnici osoba sa poteškoćama u mentalnom razvoju, kako bi ostvarili što kvalitetniji dijalog s ciljem prevladavanja barijera koje postoje u društvu ka ovoj marginaliziranoj skupini.



Cjelokupni projekat ne bi bilo moguće izvesti bez generalnih pokrovitelja projekta: Vlada Tuzlanskog kantona, te Bošnjačka zajednica kulture „Preporod“ Sjeverne Amerike, ali i bez podrške svih drugih partnera i sponzora projekta koji su ovo omogućili. Tokom projekta je vršena i promocija DITA proizvoda, sa ciljem podsticanja na kupovinu domaćih proizvoda i razvoja loklanih firmi i biznisa. Ambasadori projekta su Amel Tuka, Igor Emkić i Mustafa Mehić.



Projekti ovakvog karaktera predstavljaju samo male pomake u borbi za jednakost i smanjenje predrasuda kada su u pitanju osobe sa poteškoćama u mentalnom razvoju, te su nam svima podsjetnik da ova bitka nije samo jedan događaj ili projekat, nego kontinuiran proces na kojem moramo svakodnevno raditi, baš kao što su to radili i članovi BoHeMSAe u ovih nekoliko dana.



H.O. MUSLIMANSKO DOBROTVORNO DRUŠTVO – MERHAMET DOBOJ

Ul. Kralja Aleksandra 17, 74000 Doboј

Tel./fax: +387 53 226 886

E-mail: merhamet.doboj@cutuk.net

FB: www.facebook.com/Merhamet-Doboj

Merhamet Doboј, kao i svaki drugi mjesec izvršava svakodnevne aktivnosti kao što su:

- Evidentiranje članova, stvaranje baze podataka;
- Pomoć socijalno ugroženim kategorijama akcijama humanitarne pomoći (hrana, higijena, garderoba, školski pribor i novčana pomoć i dr.);
- Pružanje zdravstvene pomoći socijalno ugroženim članovima (kontrola šećera, holesterola, triglicerida, krvnog pritiska i dr.);
- Pomoć starim i bolesnim osobama koji žive sami – kućna njega;
- Individualne posjete aktivista „Merhameta” teško oboljeloj djeci i socijalno ugroženim i uručenje pomoći;
- Prisustvo mnogim radionicama, seminarima, okruglim stolovima i drugim sesijama.

1.4. vršena je podjela humanitarne pomoći. Ovom raspodjelom humanitarne pomoći obuhvaćeno je 350 porodica. Na ovaj način smo mi iz „Merhameta” Doboј obradovali i potpomogli naše drage članove.

7.4 održan je okrugli sto za upoznavanje sa Ombudsmanom za ljudska prava. Sastanku je prisustvovao naš sekretar „Merhameta” Doboј, Kenad Purač. Tema sastanka bila je otvaranje nove kancelarije u Doboју, gdje će Ombudsman za ljudska prava sarađivati sa nevladinim organizacijama za bolju budućnost.



13.4. u Maglaju je održana skupština UNIJE ZA ODRŽIVI POVRATAK I INTEGRACIJE (UZOPI). Prisutni su bili iz cijele BiH, a na skupštini su, između ostalog, evidentirani problemi i projekti koji treba da se realizuju.



14.04 u Banja Luci je održan sastanak regionalnog odbora Merhameta u R.S. i razmatrani problemi koji su već dugo prisutni.

18.4. na dan obilježavanja „Međunarodnog dana spomenika“ aktivisti Merhameta Doboja, tj. koalicije „TOLERANTNO I POZITIVNO IZ DOBOJA“ su boravili u Zavidovićima, na poziv koalicije „Kultura mira“, gdje su posjetili: Katoličku crkvu SV. Josip, Džamiju u Rujnici, kamene kugle u Mećevićima, Manastir Vozučicu i na kraju Vila Krivaja.

Bilo je nezaboravno...



25.04. održan je okrugli stol na temu: „Zajedno protiv korupcije, otporni na štelu“. Na ovom okruglom stolu vršeni su razgovori i prijedlozi o boljim saradnjama i borbi za prava i regularnosti. Sastanku su prisustvovali: predsjednica Merhameta Avdić Faketa, načelnici opštine Teslić, Usore, Broda i mnogi drugi.



Omladinski klub "DIJAMANT"

Ul. Bučići 42, 70101 Jajce

Tel./fax: +387 30 279 444, 61 179 209, 63 366 811

E-mail: m.sekib@bih.net.ba

WEB: www.ocd-dijamant.net, www.dijamantmoda.com

Afirmacija povratničke populacije kroz edukaciju za zapošljavanje i samozapošljavanje

Projekat Omladinskog kluba „Dijamant“ - Afirmacija povratničke populacije kroz edukaciju i osposobljavanje za zapošljavanje i samozapošljavanje uspješno se implementira i u samoj je završnoj fazi.

Fokus projekta je na afirmaciji povratničke ženske nezaposlene populacije, a kroz uključivanje u praktične edukativne radionice, sa ciljem podučavanja i usvajanja osnovnih vještina veza, šivanja i tkanja, tako da su učesnice dobile osnovno znanje i vještine koje će im pomoći da na najkvalitetniji način svoje poslovne ideje pretvore u poslovni plan. Ne samo da smo im dali potporu u samozapošljavanju i ekonomskom osnaživanju, nego smo i pokrenuli i sačuvali zaboravljene oblike kućne radinosti kroz edukativne radionice. Projekat je podržalo Ministarstvo za ljudska prava i izbjeglice BiH.



Koalicija za borbu protiv mržnje „Zajedno“

Povodom Dana planete Zemlje 22. Aprila, Koalicija za borbu protiv mržnje "Zajedno" Jajce organizovala uređenje školskog dvorišta Osnovne škole „Jajce“ Kruščica. Aktivisti i volonteri Omladinskog kluba „Dijamant“ i učenici Osnovne škole „Jajce“ Kruščica radili su na uređenju školskog dvorišta, sadili cvijeće, očistili papirni i plastični otpad, što je na kraju akcije rezultiralo čistim i uređenim školskim dvorištem.





Omladinski Klub "Pod istim suncem" Jablanica

Trg oslobođenja b.b. 88420 Jablanica

+38736753475

okpis.jablanica@gmail.com

<http://www.okpis.org>



Anna Lindh Fondacija Bosanskohercegovačka mreža

Održan trening Learning indeed – a step beyond!

U Sarajevu je, od 24. do 30. aprila, u organizaciji Omladinskog kluba Pod istim suncem iz Jablanice, održan trening Learning indeed – A step beyond! na kojem je učestvovalo 20 mladih iz Austrije, Bosne i Hercegovine, Hrvatske, Crne Gore, Bugarske, Turske, Egipta i Mađarske. Na sedmodnevnom treningu mladi su učili o dijalogu između kultura, ljudskim pravima, miru, stereotipima, predrasudama, diskriminaciji i ksenofobiji. Imali su i priliku učiti vještine za borbu protiv negativnih trendova u regionu, te za organizovanje lokalnih akcija u svojim zajednicama.



Učesnicima se na treningu obratio i koordinator nacionalne kancelarije ALF bosansko-hercegovačke mreže Miralem Tursinović, a imali su priliku i učestvovati na panelu o mirovnim akcijama "Lične priče", na kojima su panelisti bili Goran Bubalo (Mreža za izgradnju mira), Čedomir Glavaš (Odisej Bratunac) i Zek Dundar (Omladinski ambasadori mira).



LEARNING INDEED - A STEP BEYOND! APRIL 2017, SARAJEVO, BOSNIA AND HERZEGOVINA

Trening je dio jednogodišnjeg programa koji Omladinski klub provodi u saradnji sa Dynamic Development asocijacijom iz Istanbula, Turska, a koji podržava Anna Lindh Fondacija.

Aktivnosti koje slijede u narednom periodu su virtualna putovanja, te lokalne akcije u zajednicama.

Više informacija dostupno je na www.okpis.org i www.learning-indeed.net.



24-30.4.2017. SARAJEVO LEARNING INDEED WWW.LEARNING-INDEED.NET



Međunarodni centar za djecu i omladinu FORTIS

Ul. Suljo Čilić bb, 88420 Jablanica

Tel./fax: +387 63 334 993, +387 61 327 427

E-mail: centarfortis@yahoo.com

Web: www.centar-fortis.org

Prezentacija projekta „Let's Do It“

Sve je spremno za akciju čišćenja u Općini Jablanica. Predstavnici Međunarodnog centra za djecu i omladinu „Fortis“ i Asocijacije srednjoškolaca - Lokalni tim Jablanica su u JU Srednjoj školi u Jablanici održali prezentaciju na temu „Ekologija života“.



U toku diskusija i rasprava zaključci su bili sljedeći: Najveći zagađivači prirode su ljudi. Zagađuju prirodu na mnoge načine, tako što: bacaju smeće svuda oko sebe i pale ga, prave fabrike koje ispuštaju otrovne gasove, a i kada prave velike fabrike unište mnogo prirode, betoniraju parkove, grade zgrade i kuće na travnjacima, i kupuju auta koja ispuštaju otrovni vazduh. Brzi način života usporava naša razmišljanja u društvu. Ne mislimo više mnogo na budućnost već samo na trenutnu korist i efikasnost. Samo djelovanje fosilnih goriva je jedan od najvećih uzroka zagađenja.

Ljudi, djeca, omladina, stariji, bi trebali povesti više računa o životnoj sredini u kojoj žive. Opet je čovjek taj koji plaća cijenu zarad toga što stoljećima nanosi okolini i prirodi. Oni koji, svojim individualnim ambicijama, željom za većom zaradom, ljenošću, neodgovornošću, prirodi nanose štetu, gube iz vida da su i sami dio te prirode. Gubi se iz vida činjenica da će se takav destruktivni odnos prema prirodi vratiti i njima samima.

„Let's Do It“ projekat u Bosni i Hercegovini je počeo 2012. godine i dio je svjetskog pokreta „Let's do it World“ u kojem učestvuje 112 zemalja. Volonterske akcije „Let's Do It – očistimo zemlju za 1 dan“ i „Let's Do It – milion sadnica za 1 dan“ se organizuju sinhronizovano u jednom danu na području cijele Bosne i Hercegovine.

Radionica za mlade

Mladi u općini Jablanica (njih cca. 2966) nemaju puno prilike da učestvuju u radionicama tipa digitalne fotografije. Stoga je u sklopu projekta „Razglednica“ - Škola digitalne fotografije za mlade, u subotu, 15.4. organizovana besplatna radionica za mlade u prostorijama Centra „Fortis“ u Jablanici.

Ovim projektom mladi tokom škole uče tehnike snimanja fotoaparatom, koriste se web stranicama koje na kraju izrađuju sami, usavršavaju postojeće znanje iz ovih oblasti, ističu svoje umjetničke sposobnosti i imaju mogućnost da nakon toga svoje znanje prenose vršnjacima. Projekat nastaje iz potrebe mladih za kreativnim vidom provođenja slobodnog vremena i nedostatka sličnih programa u lokalnoj sredini za koju se program realizuje. Učesnici su na kraju radionice imali i kratki test znanja naučenog.



Budući da BiH teži ulasku u Evropsku uniju, potrebno je i da u domenu obrazovanja mladih ispuni određene kriterije date u konvencijama EU i strategijama EU. Kako bi mladi izgradili sebe kao ličnosti koje će sutra doprinositi cjelokupnom društvu, korisno je, ako ne i neophodno, da mladi provode korisno svoje slobodno

vrijeme. Kroz korisno iskorišteno slobodno vrijeme mladi dolaze do novih znanja, vještina i kontakata koje mogu iskoristiti za vlastiti napredak.

Projekat je podržan od Federalnog ministarstva kulture i sporta-Federalnog ministarstva kulture i športa, Mreže za izgradnju mira, Vijeća mladih općine Jablanica.

Radionicu organizuje Međunarodni centar za djecu i omladinu "Fortis" iz Jablanice, a predavač besplatne radionice je bio Alik Lončar.

Slike i video isječke možete naći na ovom linku:

<https://www.youtube.com/watch?feature=share&v=DzE7amvtpuM&app=desktop>

Akcija čišćenja



U nedjelju, 30. aprila održana je akcija čišćenja u Jablanici, u sklopu ekološke akcije i projekta Let`s do it – očistimo zemlju za jedan dan! Već sedam godina je prošlo kako Međunarodni centar za djecu i omladinu „Fortis“ iz Jablanice realizuje projekat „Let`s do it“. Ovo je dvanaesta po redu akcija od 2012. godine koja se održava u općini Jablanica, a sa istim ciljem: da naša ekološka svijest bude veća. Akcija je bila pomjerena sa 22.4. na 30.4. radi nepogodnih vremenskih uslova, a čistio se dio korite rijeke Doljanke i dio puta ka „Livadama“.

Ove godine su neizostavnu podršku dali članovi Asocijacije srednjoškolaca u BiH – lokalni tim za Jablanicu. U toku predavanja oni su učenicima I i II razreda srednje škole držali prezentaciju o ekologiji života.



Opomena bi trebala biti svima: čuvajte prirodu, nema ko drugi!



SAOPŠTENJA / INFORMACIJE / DONATORI / POZIVI

Novi Direktorij donatora u BiH.

Drage kolegice i kolege,

Veliko mi je zadovoljstvo sa vama podijeliti novo, jedanaesto izdanje, Direktorija donatora, vodiča za finansiranje organizacija civilnog društva u BiH, ali i u regionu. Potrajalo je mnogo duže no što je trebalo, dvije godine pauze od zadnjeg izdanja i više mjeseci rada na ovom izdanju, ali nadam se da ćete naći korisnim 574 donatora i poziva za projekte koje smo objavili u ovom izdanju (kao usporedba 230 više no u zadnjem).

Link na Direktorij donatora: <https://www.mreza-mira.net/vijesti/aktivnosti-mreze/direktorij-donatora-mreze-za-izgradnju-mira/>

Direktorij donatora je pripremila Mreža za izgradnju mira, koalicija koja okuplja 105 organizacija i 15 škola koje rade na čitavoj teritoriji Bosne i Hercegovine. Ideja je da Mreža za izgradnju mira u saradnji sa svojim članicama sve aktivnosti usmjerava ka obnovi kvalitete društvenog i ekonomskog života u BiH, djeluje u cilju dugoročnog povećanja sposobnosti cijelog bh. društva u ophođenju s različitostima i sukobima na konstruktivan i nenasilan način, te na taj način stvori preduslove i okvir za zajedničko, koordinirano djelovanje niza nevladinih organizacija, lokalne uprave i samouprave, poslovnog sektora, medija i državnih institucija.

U našem radu utičemo na konkretne inicijative vezane za područja javnih politika koje su prepoznate kao ključne za dugoročnu izgradnju mira u BiH, a to su: obrazovanje, sigurnost, regionalni razvoj, zaštita i promocija ljudskih i manjinskih prava, suočavanje s prošlošću i tranziciona pravda, rodna ravnopravnost, kultura javnog dijaloga i demokratije, jačanje kapaciteta civilnog društva za izgradnju istinskog mira, vraćanje povjerenja među bh. narodima, konstruktivnije djelovanje na vladajuće političke strukture u BiH i poboljšanje suživota u BiH.

Srdačni pozdravi,
Goran Bubalo



Poziv za prijedloge



SOS Dječija sela International je krovna organizacija globalne federacije od 136 nacionalnih udruženja SOS Dječijih sela, koja radi u više od 2000 programskih lokacija širom svijeta. Radimo zajedno sa jednom misijom: da osiguramo da svako dijete odraste sa ljubavlju, sigurnošću i poštovanjem. Jedinstveno, pružamo alternativnu brigu za djecu koja su izgubila roditeljsko staranje (servisi porodične brige/FBC) i radimo sa ranjivim porodicama i zajednicama kako bismo pomogli jačanju i prevenciji napuštanja djece (projekti jačanja porodice/FS).

Program jedinice FBC su obično organizovane u obliku klastera SOS obitelji, gdje se SOS staratelji brinu za male grupe djece. Kroz naše programe jačanje porodice, SOS Dječija sela pomažu porodicama da se brinu o sebi pružajući materijalnu podršku, brigu o djeci, obrazovanje, savjetovanje - sve što je potrebno kako bi porodice mogle postati samoodržive i ostati zajedno. Za više informacija, molimo pogledajte našu web stranicu: <http://www.sos-ds.ba/>.

Zadovoljstvo nam je podijeliti poziv za podnošenje prijedloga za obavljanje procjena socijalnog uticaja u SOS Dječjim selima Bosne i Hercegovine, na osnovu interno razvijene metodologije. Kandidati se ohrabruju da zatraže tendersku dokumentaciju do 10. maja 2017. putem e-maila rejan.igor.roic@sos-ds.ba, kako bi dobili Vodič za zahtjev za prijedloge i istraživanje.

Prijedlozi trebaju biti poslani prema uputama opisanim u Zahtjevu za prijedloge najkasnije do 15. maja 2017. godine.

Hedayah poziv za podnošenje prijedloga: Jačanje otpornosti na nasilje i ekstremizam u regijama centralne Azije i zapadnog Balkana

Jačanje otpornosti na nasilje i ekstremizam STRIVE-Global, koji je finansiran od strane Evropske unije (EU), u okviru finansijskog Instrumenta za doprinos stabilnosti i miru (IcSP), trenutno traži prijedloge kako bi se odgovorilo tekućim opasnostima od globalnog terorizma i potrebi za efikasnim odgovorima koji ublažavaju, a ne pogoršavaju prijetnju.

Fokusiran na prevenciju, sveukupni cilj programa je izgradnja kapaciteta državnih i nedržavnih aktera da efikasno ospore radikalizaciju i regrutaciju u terorizam, poštujući ljudska prava i međunarodno pravo. Osim toga, specifični cilj je raditi sa lokalnim partnerima kako bi se dizajnirali, implementirali i razvili pristupi koji imaju dokazan utjecaj na opasnosti od radikalizacije i regrutacije u terorizam. Da bi došli do tih ciljeva, istraživanja koja istražuju vodiče ekstremnog nasilja će biti polazna osnova za vođenje pristupa zasnovanih na činjenicama i radnji kako bi se smanjila radikalizacija i terorizam.

Kao Međunarodni centar izvrsnosti za suzbijanje nasilnog ekstremizma, Hedayah snažno promovira globalnu dobru praksu zasnovanu na dokazima: dizajn i razvoj svih inicijativa u oblasti sprečavanja i suzbijanja nasilnog ekstremizma (P / CVE) moraju odražavati analizu relevantnih domaćih vodiča nasilnog ekstremizma.

Ciljevi

Globalni cilj ovog poziva za podnošenje prijedloga je: razviti istraživačke resurse koji pružaju osnovu dokaza za intervencije CVE.

Specifični cilj ovog poziva za podnošenje prijedloga je: podržati istraživačke inicijative koje imaju za cilj da se istraže vodiči radikalizacije i nasilnog ekstremizma:

- Ustanoviti i razumjeti radikalizaciju i privlačnost terorizma.
- Profilirati radikalne aktere, pristalice terorizma i strane borce, motivaciju i aspiracije.
- Vodeći akcije da se zaustave procesi radikalizacije koji vode pojedince prema nasilnom ekstremizmu, smanjiti radikalizacija do terorizma i utvrditi koji alate će najbolje raditi u borbi protiv prijetnje i za izgradnju održivih preventivnih mjera.

Područja interesa

Za ovaj poziv za podnošenje prijedloga područja interesa su:

- Žene i radikalizacija
- Religija i radikalizaciji
- Mladih, obrazovanje i radikalizacija
- Društveni mediji / masovni mediji i radikalizacija
- FTF povratnici- radikalizacija i de-radikalizacija / pad i oslobođenje

Informacije o finansiranju

Indikativna dodjela sredstava po geografskoj distribuciji:

- Lot 1. Centralna Azija (Kazahstan, Tadžikistan, Uzbekistan, Turkmenistan). 190.000 EUR.
- Lot 2. zapadni Balkan (Albanija, Bosna i Hercegovina, Makedonija, Crna Gora i Srbija). 190.000 EUR.

Svaki grant zatražen u okviru ovog poziva za podnošenje prijedloga mora biti između sljedećih minimalnih i maksimalnih iznosa:

- Minimalni iznos: 20.000 EUR
- maksimalni iznos: 50.000 EUR

Kriteriji podobnosti

Kako bi bio prihvatljiv za grant, kandidat mora:

- biti pravno lice koje je osnovano u bilo kojoj od navedenih zemalja,
- biti neprofitan,
- biti organizacija civilnog društva ili fakultet, uključujući nevladine neprofitne organizacije i međusobno zavisne političke fondacije, organizacije bazirane na zajednici, neprofitne agencije privatnog sektora, institucije i organizacije i mreže na lokalnom, nacionalnom, regionalnom i međunarodnom nivou sa sjedištem u bilo kojoj od navedenih država,
- biti direktno odgovoran za pripremu i upravljanje projektom sa koaplikantom (ima) i pridruženim subjektima, ne djeluje kao posrednik i
- ima jaku pozadinu u društvenim istraživanjima u ovom polju.

Kako se prijaviti

Zainteresovani kandidati moraju preuzeti obrazac za prijavu iz date web stranice.

Prihvatljive zemlje

- Centralna Azija: Kazahstan, Tadžikistan, Uzbekistan, Turkmenistan
- Zapadni Balkan: Albanija, Bosna i Hercegovina, Makedonija, Crna Gora i Srbija

Za više informacija, molimo posjetite STRIVE-Global.

Izvor:

<https://www2.fundsfornegos.org/narcotics-drugs-and-crime/hedayah-call-proposals-strengthening-resilience-violence-extremism-central-asia-western-balkans-regions/>



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:

Omladinski resursni centar Tuzla
Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba
hcatuzla@bih.net.ba

Mjesečni bilten uređuje
Omladinski resursni centar -
ORC Tuzla

WEB stranica Mreže:
www.omladina-bih.net

Mejling lista Mreže:
posta@omladina-bih.net

Webmaster:
emir.delalic@gmail.com